

- उपराष्ट्रपति सी.पी. राधाकृष्णन जनता री सेवा ने जननुमाइंदा री सब ऊं मोटी जिम्मेदारी बताया-मतदातावां री बात धीरज अर संवेदनशीलता ऊं सुणण री अरज करी।
- केन्द्रीय मंत्रिमंडल सेमीकंडक्टर मिशन टू पाइंट ओ अर मोबाइल फोन निर्माण सहित कई अहम फैसलों पर मुहर लगाई।
- राज्य में गर्भवती महिलाओं के स्वास्थ्य जांच का सघन स्क्रीनिंग अभियान शुरू-अधिक जोखिम वाली स्त्रियों की विशेष निगरानी की जाएगी।
- प्रदेश में मॉनसून के दूसरे दौर के सक्रिय होने के आसार के बीच 18 जिलों के लिए बरसात का अलर्ट।

000

उपराष्ट्रपति सी.पी. राधाकृष्णन कयो है के जनता मतदान करने लोकतंत्र मांय आपरो भरोसो बतावे है। वणा जन नुमाइंदा ऊं जनता रा ई भरोसा ने बणाया राखण सारू पूरी ईमानदारी, निष्ठा अर लगन रे साथे काम करण री अरज करी। श्री राधाकृष्णन आज जयपुर मांय राजस्थान विधानसभा रा 75वां साल रे मौके व्हीया मौजूदा अर पैली रा विधायकां रा सम्मेलन मांय बोल रिया हा। उपराष्ट्रपति कयो के राज्य विधानमंडल भारतीय लोकतंत्र री धडकन है। संसद पूरा देश री आसावां री नुमाइंदगी करे है, वठे ई राज्य विधानसभावां, गांवां, नगरां अर पिरवारां री आशावां, सपना अर चिंतावां री आवाज है। अ ई विधानमंडलां रो मूल स्वर अर गरिमा है। वणा जननुमाइंदा ऊं आपरा वोट देवण आळा ऊं नमने मिलण अर धीरज अर संवेदनशीलता रे साथे वां री बात सुणण री अरज करी। उपराष्ट्रपति कयो के जननुमाइंदा चाहे सत्ता पक्ष रा व्हे, या विपक्ष रा, वां रा सार्थक अर नीतिगत सुझावां ने जरूर काम मांय लावणा चाहिजै, इण ऊं मोटो बदलाव आवे है। वणा कयो के लोकतंत्र री ताकत विधानमंडलां रा भवनां रे शानदार होवणो नी है बल्कि वां मांय गुणवत्तापूरण आचरण अर चर्चावां मांय है। इण ऊं पैला समापन जळसा ने राज्यपाल हरिभाऊ बागडे अर विधानसभा अध्यक्ष वासुदेव देवनानी ई संबोधित करया।

000

लोकसभा अध्यक्ष ओम बिरला सम्मेलन रा उद्घाटन सत्र मांय शिरकत करी। सम्मेलन मांय पैली रा अर ठावा विधायकां रो सन्मान ई करी ज्यो।

000

केन्द्रीय मंत्रिमंडल सेमीकंडक्टर मिशन टू पाइंट ओ अर मोबाइल फोन निर्माण योजना ने मंजूरी दी है। प्रधानमंत्री नरेन्द्र मोदी री सदरत मांय आज व्ही मीटिंग मांय वाराणसी मांय दो एलिवेटेड कॉरिडोर बणावण रा प्रस्ताव माथे भी मुहर लागी है। बैठक रे पछे केन्द्रीय मंत्री अश्विनी वैष्णव खबरनवीसां ने फैसलां री जाणकारी दी। वणा बतायो के सेमीकंडक्टर मिशन टू पाइंट ओ सारू 1 लाख 27 हजार 500 करोड़ रिप्या रा बजट ने मंजूरी दीरीजी है। इण ऊं देश ने ग्लोबल सेमीकंडक्टर नक्शा माथे लावण मांय मदद मिलेला।

000

मंत्रिमंडल साढे 62 हजार करोड़ रिप्या रा बजट रे साथे मोबाइल फोन विनिर्माण योजना ने ई मंजूरी दी है श्री वैष्णव कयो के आ योजना आवता पांच साल मांय लागू करी जाएला। ई योजना री बगत मांय कोई 39 लाख करोड़ रिप्या रा मोबाइल फोन बणाया जाएला। इण ऊं कोई 60 हजार लोगां ने सीधी नौकरियां मिलण री आस है। मंत्रिमंडल यूरिया सारू राष्ट्रीय निवेश नीति ने ई मंजूरी दी है। इण रो मकसद यूरिया हलका मांय नुवा निवेश ने बधावो देवणो है, जिण ऊं आत्मनिर्भरता रो लगस हासिल कर्यो जा सके।

000

वीबी जी राम जी योजना मांय श्रम नियोजन मांय राजस्थान देशभर मांय पहली ठौड माथे है। मुख्यमंत्री भजनलाल शर्मा री सदरत मांय योजना ने असरदार लागू करण ने ले र व्ही बैठक मांय आ जाणकारी दीरीजी। मुख्यमंत्री योजना ऊं जुड्या सगळा महकमा ने प्रदेश रा गांवाई विकास रो खाको तैयार करण ने कयो। वणा योजना रे तैत गांवाई आधारभूत ढांचां ने मजबूत बणावण वाळा कामां ने प्राथमिकता दिया जावण ने कयो। श्री शर्मा योजना रा कामां री मैपिंग अर रिकॉर्ड सारू आधुनिक तकनीक ने काम मांय लेवण माथे जोर दियो, जिण ऊं कामां री पूरी साफगोई रह सके। साथे ई असरदार सोशल ऑडिट ई करी जा सके।

000

चुनाव, मीडिया अर मतदाता शिक्षा ने लेर आज जयपुर मांय अंतर्राष्ट्रीय संगोष्ठी व्ही। नुवी दिल्ली रा अंतर्राष्ट्रीय लोकतंत्र अर चुनाव प्रबंधन संस्थान अर एन.एल.यू. जोधपुर कानी ऊं इण रो आयोजन करी ज्यो। एचसीएम रीपा मांय व्ही ई संगोष्ठी मांय बोलता मुख्य चुनाव अहलकार नवीन महाजन कयो के युवा प्रजातंत्र रो अहम हिस्सो है। स्कूल अर कॉलेजां मांय मतदान प्रक्रिया रा बारा मांय जागरुकता बधायी जावे। ई सारू राज्य मांय 25 हजार इलैक्टोरल लिटरेसी क्लब बणायी ज्या है।

000

प्रदेशभर मांय आज आस वाळी महिलावां रा स्वास्थ्य जांच रो मोटो स्क्रीनिंग अभियान सरू व्हीयो। पांच दिन ताई चालण वाळा ई अभियान मांय ऊंची जोखिम वाळी महिलावां री खास निगराणी करी जाएला। एएनएम, आशा सहयोगिनियां अर सीएचओ गर्भवती महिलावां री सेहत रो ब्यौरो राखेला। ई बीचे चिकित्सा मंत्री गजेन्द्र सिंह खींवसर आज बांसवाड़ा मांय मीडिया साथे बतळ मांय कयो के सरकार आस वाळी महिलावां रा स्वास्थ्य ने लेर घणी संवेदनशील है। न्यारी-न्यारी ठौड़ां माथे अजे ई व्ही प्रसूतावां री मौत रा सवाल माथे वणा कयो के विशेषज्ञां री टीम ने वास्तविक कारणां री जांच कर री है। श्री खींवसर कयो के घणकरा मामला मांय किंणी तरह रा संक्रमण अर दवाइयां रा रिएक्शन अजे ताई सामी नी आया है।

000

विश्व युवा कौशल दिवस रे मौके आज प्रदेश मांय न्यारा-न्यारा आयोजन व्हीया। प्रभात फेरी, रैली अर दूजा जागरुकता कार्यक्रमां री मार्फत नौजवानां ने आत्मनिर्भर बणण रो संदेश दीरी ज्यो। साथे ही न्यारी-न्यारी औद्योगिक प्रशिक्षण संस्थानां मांय कॅरियर मार्गदर्शन सत्र ई राख्यी ज्या। जयपुर मांय व्ह्या कार्यक्रम मांय नौजवानां ने स्वावलंबी बणावण सारू वां रा कौशल विकास माथे जोर दीरी ज्यो। जळसा मांय कौशल, रूजगार अर उद्यमिता राज्य मंत्री के.के. विश्नोई कौशल विकास रा हलका मांय चोखो काम करण वाळा नौजवानां रो सन्मान कर्यो। जळसा मांय बोलता श्री विश्नोई जवानां ने कौशल सिखावण ने जोड़ने रूजगार रा मौका मुहैया करावण री सरकार री प्रतिबद्धता दोहराई।

000

राष्ट्रपति द्रौपदी मुर्मू आयुर्वेद हलका मांय आधुनिक तकनीक काम मांय लेवण माथे जोर दियो है। आज नुवी दिल्ली मांय 'सौश्रुतम् 2026' रा उद्घाटन जळसा मांय बोलता श्रीमती मुर्मू कयो के सरकार आयुर्वेद अर योग ने दुनियाभर मांय नुवी पिछाण दी है। वणा आयुर्वेदिक शल्य चिकित्सा री प्राचीन परम्परा ने वैज्ञानिक मानकां माथे थापित करण री कोशिश माथे खुशी जताई। राष्ट्रपति कयो के आयुष मंत्रालय आयुर्वेदिक स्वास्थ्य सेवा रा वैश्विक मानकीकरण ने मजबूत करण सारू विश्व स्वास्थ्य संगठन रे साथे मिलने काम करे।

000

राज्य सरकार सरकारी स्कूल भवनां री हिफाजत ने ले र घणी सावचेत अर संवेदनशील है। स्कूल शिक्षा महकमा रा अतिरिक्त मुख्य सचिव राजेश यादव आज जयपुर जिला मांय न्यारी न्यारी स्कूलां रो औचक निरीक्षण करने भवनां री हालात री जाणकारी ली। ई दौरान वणा हिफाजत अर बुनियादी सुविधावां रो जायजो लियो। श्री यादव अहलकारां ने स्कूल भवनां री हिफाजत रा बारा मांय जरूरी दिशा-निर्देश दिया। वणा कयो के स्कूल भवना री हिफाजत ने लेर कोई समझौतो नी कर्यो जावेला।

000

प्रदेशभर मांय लोग मॉनसून रा दूजा दौर रे सरू होवण रे इंतजार कर रिया है। फेरु ई लारला चौबीस घंटा मांय श्रीगंगानगर, हनुमानगढ़ अर अलवर मांय व्ही बिरखा ऊं गर्मी ऊं आराम मिल्यो। बच्चोडी ठौडां माथे लोगां ने गर्मी अर उमस रो सामो करणो पड रह्यो। मौसम महकमा रे मुजब मॉनसून एक र फेरु सक्रिय व्हे रियो है। महकमो आज 18 जिलां सारू गरज-चमक रे साथे बिरखा री गतिविधियां रो येलो अलर्ट बतायो है।

000

जयपुर मांय पहली बार काले विदेश सम्पर्क स्टेट आउटरीच कॉन्फ्रेन्स होवण जा रियो है। विदेश मंत्रालय अर राजस्थान सरकार कानी ऊं आ कॉन्फ्रेन्स राजस्थान इंटरनेशनल सेंटर मांय व्हेला। इण मांय हिफाजती प्रवासन ने बधावो देवण, फर्जी एजेंटो ऊं बचाव अर प्रवासियां रा कल्याण, निवेश अर पर्यटन समेत न्यारा न्यारा मुद्दां माथे चर्चा करी जाएला।

000

जयपुर मांय आवता म्हीना ब्रिक्स उद्योग अर व्यापार मंत्रियां री मीटिंग व्हेला। 6 अर 7 अगस्त ने होवण वाळी ई बैठक ने लेर मुख्य सचिव वी. श्रीनिवास आज तैयारियां री समीक्षा करी। वणा इण ऊं जुड़्या महकमा ने सगळा इंतजाम तय बगत माथे पूरा करण रा निर्देश दिया। मुख्य सचिव ई महताऊ अंतर्राष्ट्रीय आयोजन सारू हिफाजत अर दूजा बन्दोवस्त चाक-चौबंद राखण ने कयो है। ब्रिक्स समूह मांय ब्राजील, रूस, चीन, दक्षिण अफ्रीका, मिस्र अर दूजा देश भेळा है। ई आयोजन सारू न्यारा न्यारा देशां रा मंत्री अर ठावा नुमाईदा मण्डल जयपुर आवेला।

000

केन्द्रीय संगीत नाटक अकादमी कानी ऊं आज जयपुर मांय राष्ट्रीय नाट्य महोत्सव रो आयोजन करयो जावे। इण रे तैत केन्द्रीय संस्कृत विश्वविद्यालय मांय नाट्य प्रस्तुति तिरंगा रो मंचन कर्यो जावे। ओ कार्यक्रम महाकवि कालीदास जयंती अर वंदे मातरम् रा डेढ़ सौवां साल रा स्मरणोत्सव रे मौके राख्यी ज्यो है।

000